

禁府以時年七十二歲定罪此必請囑所為之事須下禁府推問其由
而以全科治罪為當傳曰金敬思南祚事依允餘不允再啓亦不允○
夜南方有氣如火

四月戊子朔右議政金應箕禮曹判書金詮都承旨孫仲暉京畿觀察
使任由謙詣賓廳啓曰山陵前日擇定金井之地有石難掘故為來取
稟直從前金井之下而穿穴則無復有石功役易就測其壙深則下已
十尺上亦九尺役事幾畢故臣等昨夕入來耳且上金井之下二尺之
地無石可易掘故改穿金井之時推而上之則陵前不短石物亦可容
設也且山勢直故雖下上點穴允事指水破略不差爽耳傳曰知道仍
賜酒○傳于政院曰老病宗宰及承政院開素可也政院即啓曰老病
宗宰則當磨鍊以啓但政院則時無老病者何忍即時開素乎傳曰初
一日乃服盡之日則開素何害再啓曰臣等最為近侍者也又無老病
人即時開素甚不安於心也敢辭傳曰服盡開素其勿辭○臺諫啓曰
李茁奸賊之大者也人臣密啓乃讒佞之所由始也而茁到閣門密啓
誇倡於外人曰密啓後特命賜酒也又曰我常時不得出入者恐有
不時召見故也又曰主上問我之名是將欲以我為承旨也又語禁